

**Illuutiniq niuernermi immikkut erseqqissunik maleruagassiisuusumik inatsimmik  
Naalakkersuisut suliaqqaqullugit Inatsisartut aalajangiiffigisassaattut siunnersuut**

**pillugu**

**Attaveqatigiinnermut Ineqarnermullu Ataatsimiititaliap**

**ISUMALIUTISSIISUTAA**

**Inatsisissatut siunnersuutip aappassaaneerreqarnerani saqqummiunneqartoq**

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq, Justus Hansen, siulittaasoq

Inatsisartunut ilaasortaq, Olga P. Berthelsen, siulittaasup tullia

Inatsisartunut ilaasortaq, Debora Kleist

Inatsisartunut ilaasortaq, Kim Kielsen

Inatsisartunut ilaasortaq, Akitsinguaq Olsen

Siunnersuutip siullermeerneqarnerata kingorna siunnersuut Attaveqatigiinnermut Ineqarnermullu Ataatsimiititaliap misissorpaa.

**Siunnersuutip imarisaa**

Illuutiniq niuernermi maleruagassiisumik Naalakkersuisut maleruagassialioqqullugit siunnersuuteqartup siunnersuuteqarnermigut kissaatigaa.

**Siunnersuutip Inatsisartuni siullermeerneqarnera**

Illuutiniq aalaakkaasunik niuerutiginninnermi akisut nalinginnaasut soorunalimi malinneqarnissaat pisariaqarpoq taamaattorli akit piviusorsiuunngitsumik qaffasippallaamut inissinneqarnissaat mianersuutigisariaqartoq Inuit Ataqaatigiinnit oqaatigineqarpoq. Suliassaqarfimmi ersarissunik paasiuminartunillu maleruagassiornikkut atuisut pitsaanerusumik illersorneqarnissaannik siunnersuummi siunertarineqartut Siumumit, Demokraatinit Kattusseqatigiillu Partiiannit taperserreqarput. Taamaattorli illunik niuernermi akit qaffasissusissaannut niuernermit ingerlatsisut aalajangiisuusariaqartut aammalu akit qaffasinnerpaaffissaannik assigisaannilluunnit atuutsitsilerneq naapertuutinngitsoq isumaqataaffigineqarpoq. Aammattaaq illunik niuernermi pisisartut tunisaqartartullu akinik

piviusorsioritunik oqinnerusumik aalajangersaasinnaanissaannut maleruaqqusat iluarsisat peqataaqataassasut, taamaattumillu akit qaffasinnerpaaffissaannut maleruagassiinissaq pisariaqanngitsoq isumaqartoqarpoq.

### **Naalakkersuisut**

Illunik niuernermit atuisut annertunerusumik illersorneqarnissaat qulakkeerniarlugu suliniuteqartoqartariaqartoq Naalakkersuisut isumaqataapput. Illunik niuernermit maanna inatsit atuuttoq ullutsinnut naleqqutinngilaq aamalu Kalaallit Nunaanni pissutsinut naleqqussakkamik inatsimmik nutaamik ilusiliisoqartariaqarluni.

Marlunnik periarfissaqartoq Naalakkersuisunit oqaatigineqarpoq. Periarfissap aappaa tassaavoq nutaamik inatsisiliornissaq periarfissallu aappaa tassaalluni illunik tuniniaanermut inatsimmik Kalaallit Nunaanni atuutsitsileqqullugu danskit naalagaaffiata qinnuigineqarnissaa.

Naalakkersuisulli aamma oqaatigaat siunnersuummit arlalinnik tungaveqartoq erseqqinnerusumik misissoqqissaarneqartariaqartunik, taamaattumillu inatsisissatut siunnersuut aatsaat 2011-mi saqqummiunneqarsinnaassalluni. Inatsisitigut suliniutinik naliliilluni aamalu periuseq sorleq naapertuunnerpaassanersoq pillugu naliliilluni kiisalu siunnersuut aningaasaliissutitigut pissutsinik qanoq ittunik kinguneqassanersoq pillugu naliliilluni suliaq Naalakkersuisunit maannangaaq aallartinniarneqarpoq.

### **Attaveqarnermut Ineqarnermullu Ataatsimiititaliap siunnersuummik suliarinninnera**

Niuernermik ingerlatsisut akit qaffasissusissaannik aalajangersaanissamut naleqqunnerpaasutut isigineqarmat akinut maleruaqqusanik atuutsitsilernissaq ataatsimiititaliamit naapertuutinngitsutut isigineqarpoq, pingaartumik illut tuniniarneqartut qanoq issusiat pisisussanit tunisisussanillu ilisimaneqalernissaat inatsit aqutigalugu qulakkeerneqarpat. Taamaalilluni ataatsimiititaliaq isumaqarpoq illunik niuernermit pisisussanik tunisisussanillu illersuisut illut ataasiakkaat qanoq issusiviat malillugu illut nalingannut naapertuunnerulernissaannut maleruaqqusat iluarsisat peqataaqataassasut ataatsimiititaliaq isumaqarpoq.

Taamaattumik maleruaqqusanik ersarissunik paasiuminartunillu illunik niuernermit maleruagassiisunik pilersitsinissamik siunnersuuteqartup siunertarisaa ataatsimiititaliamit isumaqatigiittumit taparserneqarpoq. Tamanna qanoq pitsaanerpaamik ingerlanneqarsinnaanersoq pillugu naliliinissaq ingerlaannartumik Naalakkersuisunit aallartinniarneqartoq ataatsimiititaliap nuannaarutigalugu paasivaa. Tassunga atatillugu suliap ingerlarnga pillugu ingerlaavartumik ilisimatinneqartarnissaminik ataatsimiititaliaq qinnuiginnippoq.

Maleruaqqusanik nutaanik suliaqartoqassanersoq imaluunniit tunisaqartarneq pillugu inatsimmik Kalaallit Nunaannut atuutsitsisoqalerpat tulluarnepaassanersoq pillugu naliliisoqartariaqarneranik Naalakkersuisut isumaat ataatsimiititaliamit isumaqatigineqarpoq. Taamaakkaluartoq periarfissat tamarmik siunnersuummi matumani ilaatinneqarsinnaapput, taamaattumillu siunnersuummut tapersiinini ataatsimiititaliap oqaatigissavaa.

**Attaveqarnermut Ineqarnermullu Ataatsimiititaliap inassuteqaataa**

Siuliani oqaatigineqartut aammalu siullermeerinermi oqaatigineqartut tunngavigalugit siunnersuut **akuerineqassasoq ataatsimiititaliap isumaqatigiittup inassutigaa.**

Taama oqaaseqarluni Attaveqarnermut Ineqarnermullu Ataatsimiititaliap siunnersuut Inatsisartunut aappassaaniigassanngortippaa.

---

Justus Hansen,  
Siulittaasoq

---

Olga P. Berthelsen,  
Siulittaasup tullia

---

Debora Kleist

---

Kim Kielsen

---

Akitsinnguaq Olsen